



# DETG DENTER NUS

MAGAZIN UFFICIAL DALLA VISCHNAUNCA DA DISENTIS/MUSTÉR



Economisazun, purificaziun, allontanament

4-7

Nova strategia da taglia

8-9

Adia hotel Acla da Fontauna

14-15

Nossas uniuns: Chor baselgia Segnas

18

Avon 100 onns

19

# Kurz und bündig – Detg denter nus

Am 26. August 2023 konnte die Bevölkerung das letzte Mal Einsicht im Hotel Acla da Fontauna nehmen, bevor dieses in den nächsten Monaten abgerissen wird. Viele Interessierte haben von dieser Möglichkeit gebraucht gemacht. Die Vertreter der Immo Invest Partner SA haben über das neue Projekt, die bevorstehenden Arbeiten und den Terminplan informiert. Ziel ist das 100 Millionen Projekt anfangs 2027 in Betrieb zu nehmen. Auch Regierungsrat Marcus Caduff hat die Anwesenden auf die Wichtigkeit des Projekts aufmerksam gemacht. «Wir müssen uns vor Niemanden verstecken und an unser Potenzial in der Surselva glauben».

Des Weiteren wird in dieser Ausgabe über die Abfallbewirtschaftung und die Kläranlage informiert. So wurde bei der Hauptsammelstelle in Raveras eine neue Waage installiert, das Gesetz über die Abfallentsorgung revidiert und auf dem Dach der Kläranlage wird eine Photovoltaikanlage realisiert. Des Weiteren wird kurz über das bevorstehende Sanierungs- und Vergrösserungsprojekt der Kläranlage informiert. In den nächsten Jahren wird diese Grossinvestition nötig. Das aktuelle System muss modernisiert und den aktuellen Gegebenheiten angepasst werden.

Ausserdem hat der Gemeindevorstand eine neue Steuerstrategie definiert. So ist vorgesehen, in den nächsten Jahren einen Steuerfuss von 98% zu erlangen. Um dieses Ziel zu erreichen, soll der Steuerfuss bis ins Jahr 2029 um jährlich 2% angepasst werden. Diese neue proaktive Steuerstrategie ist einer von mehreren Puzzleteilen, um die Attraktivität der Gemeinde Disentis zu steigern. Mit

einer stabilen und stetigen Reduktion des Steuerfusses wird ein gesunder Finanzhaushalt und die nötigen jährlichen Investitionen in die Infrastruktur und der Entwicklung der Gemeinde garantiert. Ein weiteres innovatives Pilotprojekt ist das «E-TukTuks Disentis/Mustér». Die Mikromobilitätslösung für die erste und letzte Meile ist ein gemeinsames Projekt mit der Fachhochschule Graubünden. Momentan wird die finanzielle Unterstützung geprüft. Sobald diese sichergestellt ist, fängt das dreijährige Pilotprojekt an. Über den entsprechenden Terminplan wird in dieser Ausgabe informiert. Ausserdem wurde zum 100-jährigen Jubiläum der Raiffeisenbank Cadi mithilfe der Gemeinde Disentis und in enger Kooperation mit dem Center Fontauna das neue Angebot «Missiun Cristalla» lanciert. Eine Rätseltour durch die Gemeinde, knifflig und interessant, für Klein und Gross ein einzigartiges Freizeiterlebnis. Die Suche nach dem magischen Kristall kann beginnen. In der Rubrik «Nies personal» kommt Gion Tenner zu Wort. Er ist seit 1992 Lehrer der Gemeinde Disentis und für den Feuerwehrstützpunkt «Sursassiala» zuständig. Ausserdem wird unter «Nossas uniuns» der Verein «Chor baselgia Segnas» vorgestellt. Wir wünschen eine gute Lektüre.

## Impressum



### Editur

Vischnaunca Disentis/Mustér  
Via Cons 2, Caum postal 57  
7180 Disentis/Mustér  
[detgdenternus@disentis.ch](mailto:detgdenternus@disentis.ch)

### Redacziun

René Epp, Hans Huonder, Carmen Wetzel

### Fotografias

Hans Huonder, vischnaunca da Mustér,  
Gion Tenner, mess a disposiziun

### Ediziun

1200 exemplars  
Cumpara mintga quartal

### Layout e grafica

luna:mediadesign GmbH,  
Via Principala 36, 7166 Trun

### Stampat

Stamparia La Tuatschina,  
Via Alpu 62, 7188 Sedrun

## Temps d'avertura dall'administraziun communalia

Valeivel per tuts uffecis en casa communalia

### Spurtegl

Gliendisdis	08.30 – 11.30	15.00 – 18.30
Mardis-gievgia	serrau	15.00 – 17.30
Venderdis	07.30 – 14.00	serrau

### Telefon

Gliendisdis-gievgia	08.00 – 12.00	13.30 – 17.00
Venderdis	07.30 – 14.00	serrau

Igl access en casa communalia e l'investa els documents exponi publicamein ein pusseivels duront las uras d'avertura dil spurtegl.

Ulteriur sclariment duront las uras da telefon  
**081 920 36 36.**

## Las sfidas dil gerau

Pi gl interess per la politica communalala sco regiunala accumpogna mei gia dapi giuvens onns. Era duront ils onns da studi a Turitg hai jeu persequitau cun grond interess il svilup communal. Suenter miu retourn en vischernaunca sun jeu sedecidius da s'engaschar politicamein. Enstagl da sulettamein commentar las decisiuns dils gremis politics en ronda privata, hai jeu giu il giavisch da mez surprender responsabladad e semetter a disposiziun per in uffeci communal. Miu giavisch ei adina staus da buca mo discutar davart las sfidas communalas, mobein da tschappar en la lavour ed encurir soluziuns concretas. Sin quella basa hai jeu rimnau la stad 2020 las suttascripziuns necessarias per ina candidatura en suprastanza communalala e giu il cletg da veginr eligius sco gerau per la legislatura 2021-2024 cun in resultat legreivel.

La lavour en suprastanza ei fetg interessanta e varionta. Ils discours ein intensivs e vivs ed il respect d'in l'auter ei adina daus. Jeu hai persunalmein grond plascher da quella lavour e sai emprender bia - persunalmein sco professiunalmein.

Las responsabladads sco gerau pil departament d'ambient e segirtad ein multifaras e cuntegnan denter auter temas sco il provediment e la purificaziun dallas auas, ils pumpiers, il santeri e la dismessa da rumians. Il temps da lavour che vegin impundius per las incumbensas sco gerau corrispunda ad in pensum da lavour da rodund 20 %. Era sch'ils mieds moderns d'informatica lubeschan in luvrar fetg flexibel, eis ei sco gerau vinavon impurtont da saver esser presents a sedutas da tuttas uras. La premissa per tala lavour sto esser in patrun che porscha in'alta flexibilitad da lavour ed ina famiglia che ha capientscha pigl engaschi communal.

Nies sistem da milissa ei secumprovaus ed in model era pigl veginr. Per mantener ina cultura da debatta marcada da respect stuein nus ga per ga anflar cumpromiss. Cun proclamar igl agen meini ei aunc pauc sligiau. Il cumpromiss ei medialmein lungurus e pauc attractivs per ina carriera sco politicher, denton eis el la basa per ina convivenza equilibrada. La responsabladad per ina democrazia viva ed equilibrada schai en nos mauns e vegin buca delegada si da Cuera ni da Berna. Dapli convischins che separticipeschuan ad in discours respectus e pli ulivaus e gests ch'il cumpromiss daventa.

Paul Flurin Schmidt, gerau



Paul Flurin Schmidt,  
gerau

# Economisaziun, purificaziun, allontanament

## Introducziun

Essan nus pertscharts cura che nus emplenin il sac da rumien ni cura che nus svidein liquids ed autra rauba ch'auda buca ella canalisaziun che nus consumein e nezegein onn per onn bunamein treis ga las resursas ch'ein destinadas per nus duront in onn. Buca tuttas naziuns e buca tuttas societads sin quei planet san selubir da sfarlatar quei che la scaffizun metta a disposiziun a nus en in onn. Il rumien che nus producin en in onn, mo era l'aua che nus tartignein cun nies cunfar ei mo ina part da quei trafficar. Aschia ei era buca tut quei ch'ein apparentamein biologic bien per nies organissem. Quei che po ornar nossas crunas

da matg, stivas e vitrinas cun flurizun sa esser in prighel per nossas jarvas, per plontas e per la biodiversitat. Deplorablamein setschenta memia bia da quella rauba sin las rivas da nos flums ed uals e sin deponias illegalas. Perquei che nus essan dil mein che quei ch'ein carschiu organicamein astga vegin deponiu ella natira, mo falliu la noda. Buca tut quei ch'ein organic auda deponiu ella natira.

Podà che quels patratgs ein forsa empau verds e fasierlis. Els ein denton in fatg e caschunan fastedis e cuosts.



### Risti

Cheu igl emprem process da purificaziun. Quei che vegn dismess ella canalisaziun che udess buca en leu vegn allontanau cul risti, pachetau el container e dismess cul rumien. Cheu vegn ensemen tut quei ch'auda buca ella canalisaziun.



### Pressa da gliet

Quei che varga il risti setschenta el gliet. Avon ch'il gliet setschenti ella smarschera vegn quel pressiaus da quella pressa. Pelegna, cavels, preservativs ed auter ch'il resti po buca zavrav vegn alla fin dil process da purificaziun allontanau ord igl gliet frestg e medemamein dismess cul rumien.

## Center da rimnada a Raveras

La dismessa da rufids e rumians ei sesviluppada ad ina vera economia. Ei pretenda da risguardar las resursas ch'il mund metta a disposiziun a nus. Pia eis ei necessari che nus returnein als flums l'aua aschia sco nus havein retschiert ella. Che nus reciclein ils rufids aschia che nus savein turnar las materias aschia ch'ellas san veginr duvradas danovamein. Nus stuein esser pertscharts che quei drova in'infrastructura. In'infrastructura per sortir e per rimnar.

Tut quei ei cumbinau cun cuosts. Gia ils onns 1990 ha la vischnaunca da Mustér viu ch'e basegna mesiras organisatorias per reutilisar ils rufids e ha endrizzau in sistem da rimnada e reutilisaziun. Ils cuosts persuerter ein s'augmentai. Perquei ha la vischnaunca adattau il sistem da finanziaziun. Ulterioramein ei vegniu endrizzau ina stadera.

Plinavon ha il cussegl da vischnaunca decidiu d'installar in indrez solar sillars alas-tetg dalla serenera.



Vesta sin ina part dil center da rimnada.

## Nova stadera

La stadera ch'eit veginida messa en funcziun questa stad. Suenter ch'ella ha giu da sbatter cun entginas difficultads funcziuna ella ussa detg stupent. La soluzion culla stadera para da satisfar il meglier al sistem dil caschunader.

## Niev sistem da finanziaziun per l'economisaziun dils rufids

Tenor dretg federal e cantunal ei l'economisaziun dils rufids da finanziar entras il caschunader. L'economisaziun vul procurar che rufids che san veginr reutilisai vegnan buca dismess - barschai ni deponi -

mobein puspei utilisai (per exemplu veider e metals). La lescha davart l'economisaziun ei veginida revidida per dar dapli attenzion a quei sistem, denton era per meglierar il recav ord las taxas e cheutras cuvierer cumpleinamein ils cuosts dall'economisaziun dils rufids. Vinavon preveda la lescha il sistem cun ina taxa fundamentala, denton duei veginr migliurau il sistem da finanziaziun tenor il caschunader. Buca mo la dismessa dils rufids da casa vegin finanziada tenor quantum/sac, era pils rufids blocconts duei veginr applicau il medem sistem. Cun installar pils rufids blocconts ina stadera vegin dau dapli attenzion a quei sistem. Ferton che la dismessa dils rufids blocconts vegneva finanziada culla taxa fundamentala

succeda quei grazia alla stadera tenor il quantum furniu respectivamein la peisa effectiva dils rufids.

Il niev sistem da finanziaziun duei satisfar meglier al sistem dil caschunader. Da niev vegnan las taxas fundamentalas buca pli incassadas sin fundament da pauschalas tenor habitaziuns resp. tenor classificaziun da menaschi, mobein a basa dalla valeta nova dil baghetg (eruida entras igl uffeci per la valetaziun d'immobilias). La taxa fundamentala sedat d'ina taxa definida entras la Regiun Surselva – valeta nova ga 0,000017 (per la Regiun) e ga 0,0000,14 (per la vischnaunca) – ed ina taxa tenor ils criteris defini entras la vischnaunca per l'infrastructura communal. Ulteriuramein vegn risguardau il factur da rimnada. 1,0 leu nua che la rimnada succeda ina gada l'jamna ed 1,5 leu nua che la rimnada succeda duas gadas l'jamna.



La nova stadera

## Exempels dalla taxa fundamentala

### Casa d'ina famiglia (valeta frs. 600'000.–, in transport jamnil)

Tochen dacheu:	frs. 120.–
Da niev:	$frs. 600'000.– \times (0,00017 + 0,00014) \times 1,0 = frs. 186.–$

### Casa da pliras famiglias (valeta frs. 1'400'000.–, in transport jamnil)

Tochen dacheu:	4 habitaziuns $\times$ frs. 120.– = frs. 480.–
Da niev:	$frs. 1'400'000.– \times (0,00017 + 0,00014) \times 1,0 = frs. 434.–$

### Casa da pliras famiglias (valeta frs. 1'200'000.–, dus transports jamnils)

Tochen dacheu:	3 habitaziuns $\times$ frs. 135.– = frs. 405.–
Da niev:	$frs. 1'200'000.– \times (0,00017 + 0,00014) \times 1,5 = frs. 558.–$

Nus stuein tener casa cun nossas resursas primas. Sche nus tenin quen da quei fatg savein nus reducir ils cuosts. Vegnin nus buca pertscharts che nus stuein tener casa vegn quei a custar. La vischnaunca da Mustér ha già l'entschatta dils onns 1970 investau ellas sereneras da Disla e Raveras. Quels objects ein già vegni sanai e la serenera da Raveras spetga da vegnir sanada ed engrondida. Las investiziuns dils davos onns el Center Catrina mo era la nova surbaghegiada ad Acla da Fontauna, sco era il fatg ch'ina serenera ei duront 24 uras e 365 dis en funzion, pretendan in remplazzament da maschinas, urdeins ed electronica. Nus vegnin a stuer investar egl allontament e la purificazion dallas auas cun mantener e renovar cintinuadamein.

## Indrez solar Serenera

Ils 8 d'uost 2022 ha la suprastanza communalia decidiu da realisar sil baghetgs communaus stabiliments fotovoltaics. El Center Fontauna vegn realisau actualmein ina gronda surfatscha. Sigl atun 2023 vegn era la serenera equipada cun in indrez fotovoltaic.

La serenera Raveras basegna annualmein ca. 200'000 kw/uras energia electrica. Circa 42'000 kw/uras producescha la serenera già oz cul gas dil gliet che deriva dil process da purificaziun. Cul stabiliment fotovoltaic duei grazia al sulegl vegnir produciu supplementarmein 92'800 kW/uras energia electrica.



Ils fussals da serenaziun, amiez il fossal da preserenar, davos ils fussals d'ariaziun/biologia e davon in dils fussals secundars.

## Project Serenera


Dapi entgin temps sefatschenta la suprastonza communalera dalla sanazion ed engrondazion dalla serenera. Gl'augment dalla serenera vegn pretendius davart il cantun e stat en connex culs stabiliments novs a Sontga Catrina ed ad Acla da Fontauna. Avon che semetter vid la projectaziun da detagl duei vegnir sclariu tgei sistem ch'ei il pli efficient, aschibein concernent l'investizion mo era pertuccont ils cuosts annuals da menaschi. Il program d'investizion preveda suandont program da termins.

Per la sanazion dalla serenera ha la suprastonza communalera definiu el plan d'investizion 2024–2032 suandont proceder:

### Projectaziun Realisaziun

2024	2025	2026	2027	2028
200'000	1'500'000	1'500'000	1'300'000	2'000'000

Entochen igl atun 2023 duein las retschercas che survestan per la projectaziun esser terminadas. Igl onn 2024 duei vegnir entschiet culla projectaziun. Dasperas eis ei previu da reveder la lescha davart il provediment d'aua sco era la lescha davart igl allontanament e la purificaziun dallas auas. La vischnaunca vegn a stuer finanziar las investiziuns cun agens mieds finanzials. Cantun e Confederaziun sustegnan buca quellas investiziuns.



Quella tabla exista dapi 50 onns e dat ina survesta dalla serenera a Raveras. Per quei sistem da pilotar analog dat ei negina tocca pli. Quei vala per numerus ulteriurs indrezs electronics dalla serenera. Grazia a sias bunas relaziuns cun montaders ha il survigilader dalla serenera saviu remplazzar entochen oz indrezs existents. Cun caschun dalla sanazion dalla serenera che stat avon porta vegn quella tabla che dat ina survesta dalla serenera remplazzada entrais in sistem digital ch'ei colligiaus cumplei-namein cul computer. Il pilotadi actual succeda oz mo parzialmein sin via digitala.

# Nova strategia da taglia – situaziun finanziala dalla vischnaunca da Mustér

## Informaziun davart la situaziun finanziala

La situaziun finanziala dalla vischnaunca da Mustér dat adina puspei da discutat. Ils davos onns ei quella semidada el senn positiv. Aschia ha la suprastanza communalia saviu presentar pigl onn 2022 in resultat ch'ei staus ils davos 15 onns mo inaga megliers. Quei ei per nossa vischnaunca fetg legreivel e naturalmein da beneventar.


Quels buns resultats dils davos onns ein en emprema lingia d'attribuir a differentas entradas extraordinarias el sectur dallas taglias generalas e specialas. Cunzun igl augment dall'activitat sillla fiera d'immobilias sco era dils prezis da vendita d'immobilias ha menau tier las taglias sin gudogn da schischom e sin scumiada da maun tier in augment considerabel. Plinavon profitein nus actualmein dils autls prezis sillla fiera d'energia, cunquei che la vischnaunca sa sezza vender sia cum-part d'energia da participaziun e da concessiun.

Quellas entradas extraordinarias gidan da far las investiziuns ch'ein actualmein pli che necessarias. Plinavon vegnin nus – grazia als principis interns dil

plan da finanzas che la suprastanza communalia ha definiu – a saver tener a liunga vesta in bien equiliber denter investiziuns, amortisiuns e finanzas saunas. Las cefras indicativas cantunalas el plan da finanzas dils proxims diesch onns che vegnan aschia contonschidas dattan raschun alla suprastanza communalia e garanteschan aschia supplementarmein la segirtad planisatoria necessaria a liunga vesta.

Aschia eis ei impurtont da saver ch'il project d'innovaziun Center Fontauna ei – grazia als buns quens annuals – quasi gia finanziaus avon ch'el ei realisaus. En quella fuorma ei quei buca stau previsibel. Secapscha ei quei per la vischnaunca da grond avantatg e da grond'impurtonza. Aschia descarga quella prefinanziaziun ils quens communals futurs essenzialmein.

Igl ei egl interess dalla suprastanza communalia da far pli attractiv nossa vischnaunca sco liug da habitat. Per quei svilup progressiv procurein nus cun far las investiziuns necessarias planisadas e culla nova strategia da taglia.



## Informaziun davart la nova strategia da taglia

Sper investar ell'infrastructura communalia ed amortisar deivets ei il pei da taglia in tierz punct central. La suprastanza communalia ei pertscharta ch'era il pei da taglia ha effect sin l'attractivitat da habitat e luvrar en nossa vischnaunca. Plinavon ha era il cussegl da vischnaunca adina puspei fatg attents sill'impurtonza dil pei da taglia. La davosa reducziun

dil pei da taglia per 10% sin 110% ei succedida igl onn 2022. El messadi igl onn 2021 ha la suprastanza communalia fatg allusun ch'ella analysescha mintga dus onns da niev ina ulteriura reducziun dil pei da taglia.

La suprastanza communalia tegn plaid e ha discussiunau a caschun dalla tractaziun dil plan da finanzas



differentas variantas pusseivlas e la fin finala definiu ina strategia da taglia per nossa vischnaunca.

Quella nova strategia da taglia preveda parallel tier las investiziuns ed amortisaziuns ch'ein previdas ina reducziun da taglia pass per pass. La finamira dalla suprastanza communalala ei da contonscher ils proxims onns in pei da taglia cun in diember da duas cefras, concret 98%. Per contonscher quella finamira duei vegnir sbassau il pei da taglia ils proxims sis onns (entochen igl onn 2029) annualmein per 2%.

Cun quei agir precaut savein nus gia tier la preparaziun dil preventiv mintgamai risguardar las consequenzas e tenor situaziun gest agir a moda proactiva. Il pli impurtont ei dad haver in bien e saun tenercasa finanziel e far las investiziuns necessarias per sviluppar e far pli attractiv nossa vischnaunca. Cun ina reducziun stabila e constanta dil pei da taglia vegnин nus a contonscher quella finamira ambiziusa.

La suprastanza communalala ha era discussiunau da rudien in'eventuala reducziun pli gronda dil pei da taglia. En vesta al program d'investiziun, las amortisaziuns annualas necessarias e bein savend che nus havein fatg ils davos dus onns quens annuals cun entradas per part extraordinarias e per haver el futur finanzas saunas, vegn ina reducziun unica pli aulta buca en damonda per la suprastanza communalala. L'executiva communalala ei denton perschudida ch'ina reducziun cuntinuada dil pei da taglia ei la

dretga e la pli optimala via strategica per nossa vischnaunca.

En connex culla tractaziun dil plan da finanzas e dil preventiv vegn la suprastanza communalala mintgammal ad examinar da rudien las finanzas communalas. Aschinavon ch'ein dat buca marcantas midadas enviers la situaziun actualmein enconuschenta, vegn ella a proponer ina reducziun dil pei da taglia d'annualmein 2% entochen che quel contonscha 98%. En vesta agl ault volumen d'investiziun dils proxims onns e per saver reagir sin in eventual svilup negativ dallas finanzas (p.ex. donns da malaura ni reducziun da recavs essenzials) sa la suprastanza communalala responsar quei agir.

*René Epp, president communal*

on	strategia pei da taglia	
2023	<b>110%</b>	-2%
2024	<b>108%</b>	-2%
2025	<b>106%</b>	-2%
2026	<b>104%</b>	-2%
2027	<b>102%</b>	-2%
2028		<b>100%</b> -2%
2029		<b>98%</b>

# Project «E-TukTuks Disentis/Mustér – ina soluziun da micromobilitad pigl emprem e davos kilometer»

La Surselva stat - sco biaras autras regiuns alpinas - avon la gronda sfida dall'accessibladad dallas visch-nauncas e lur fracciuns. Dapertut nua ch'il traffic a cuorta distanza cursescha darar ni insumma buca, basegnan ils indigens sco era hospes il traffic individual motorisau, quei ch'ei buca adina adattau ed



engreviescha igl ambient. Cul project da pilot «E-TukTuks Disentis/Mustér» vul la vischnaunca da Mustér ensemencul Surselva Lab dalla Scol'aulta specializada dil Grischun, sviluppar ina purschida attractiva da «sharing» en favur digl ambient.

L'idea d'in meglier access per vischnauncas e fracciuns ella surselva cun E-TukTuks deriva dil menader tecnic dil project, Prasad Raja. Igl impressari e possesur da secundas habitaziuns ella Surselva s'occupa cun «Subeez» era pigl acquist e la laver da reparaturas dils emprems vehichels, ils quals curseschan magari tras las stortas da nossa regiun. La primavera 2023 han plirs canals medials regiunals e naziunals rapportau davart il project e siu intent.

El focus dil project ei il menaschi e l'organisaziun concepziunala d'in sistem da mobilitad, ch'ei economicamein supportabels e che cumpleteasca la purschida existenta a moda optimala. Per ina finanziaziun da partenza dil project han sper la vischnaunca da Mustér era las pendicularas da Mustér e la Regiun Surselva procuraui. Plinavon porschan plirs parterna-

## Prevedentamein vesa il plan da termins ora sco suonda:

Nr.	Pachets da lavur	Horizont da temps *
1	Acquisiziuns Partenaris da project, sustegn finanzial, contribuziun da promozion	stad 23 – primavera 24
2	Vehichels ed ils process corrispondents, utilisaziun actuala, potenzial da svilup Situaziun da «IST/SOLL»	unviern 23 – primavera 24
3	Analisa dallas cundiziuns da basa e las premissas Purschida da mobilitad locala, secuntener da mobilitad, supportabladad economica, cundiziuns generalas da diever	primavera 24 – atun 25
4	Definiziun dallas pretensiuns da pilot e menaschi ordinari Sistem da parcar, loghens, diember parcadiis e vehichels, pricing, sistem da cudischar e pagar	primavera 24 – stad 26
5	Realisaziun Parcadis, colligaziun d'electricidad, signaletica, vehichels, sistem da cudischar, evaluaziun constanta	primavera 24 – stad 26
6	Communicaziun e distribuziun Populaziun, instituziuns ufficialas, publicum d'experts	stad 23 – stad 26
7	Transformaziun en in menaschi ordinari pretensiuns, instituziun	primavera 26 – stad 26

\* Premissa: Sustegn finanzial e participaziun idealia

ris dalla regiun sco menaschis turistics e d'allo scha-  
ment, ustrias e garaschas d'auto, installaturs d'electri-  
citat, menaschis da vuctualias e fatschentas da taxi,  
lur sustegn. Las pusseivladads da sustegn ein fetg dif-  
ferentes e tonschan naven da participaziun finanziala,  
metter a disposiziun infrastructura da parcar, staziuns  
da cargar, sustegn ella communicaziun entochen tier  
ina collaboraziun enteifer il project.

Ulteriurs partenaris ni cooperaziuns el sectur da  
turissem, commerci, mistregn, da survetsch ni uniuns  
en pliras spartas ein adina beinvegni e giavischai. Las  
pusseivladads da separticipar al project san ins denter  
auter eruir en in discours persunal. Ina collaboraziun  
fetg stretga cun las instituziuns regionalas sco era la  
pusseivladad da far diever d'infrastructura existenta  
ei la premissa pil success dil project da pilot.

Per che la purschida da mobilitad innovativa sappi  
vegnir transferida ad in menaschi ordinari, basegna  
ei ulteriur sustegn finanzial. L'acquisiziun dallas  
finanzas ei in process fetg pretensius, pil qual ei vegn  
actualmein dedicau fetg bia temps. Sper damondas  
per mieds finanzials tiels uffecis federrals vegn era il  
cantun Grischun ed ulteriurs partenaris da promozion  
confruntai. Ella suandonta grafica ein ils siat pachets  
da lavour sco era il spazi da temps indicai.

Sper l'acquisiziun finanziala e da partenaris ha il team  
da project saviu profitar d'ulteriurs inscunters culla po-  
pulaziun interessada e cun persunas dil fatg (experts).

Pliras persunas ein  
engaschadas vid il project.

El rom dallas festivitads da giubileum da «200 onns  
via commercial» ha la gruppera da project «E-Tuk-  
Tuks Disentis/Mustér» saviu sepresentar al Viamala  
e-Mobility circle VeMC ell'arena Grischuna a Cazas  
venderdis e sonda, ils 23 e 24 da zercladur 2023 cun  
in agen stan d'exposiziun e cun viadis d'emprova.

Il VeMC ei sededicaus alla tematica della e-mobilitad  
el spazi alpin e ha dau sclariment davart las sfidas  
specificas per ina cuntrada buca urbana. Cheu ha era  
il project «E-TukTuks Disentis/Mustér» saviu rapportar  
davart sias empremas experientschas fatgas.

Petgei era ella Regiun Surselva dat ei – auter che el  
spazi urban – sfidas specificas, sco per exemplu las  
distanzas tendenzialmein plitost liungas, la diffe-  
renza d'altezia, la differenza da temperaturas ed  
ils fatgs topografics, per las qualas il niev sistem da  
mobilitad sto esser cumpatibels.

Plinavon separticipescha la gruppera da project era  
ils 6 doctober 2023 alla dieta specialisada dil traffic  
plauen dil cantun Grischun che ha liug a Cuera.  
Tgei che semuossa en Surselva reflectescha mede-  
mamein ell'entira Svizra: La mobilitad procura per las  
pli grondas emissiuns da gas. La transformaziun dil  
sistem da mobilitad ei e resta ina dallas pli grondas  
sfidas. Il niev sistem da mobilitad presentau duei  
porscher ina contribuziun alla soluziun.

Scol'aulta specialisada dil Grischun/Carmen Wetzel



## Il biro dil Cussegli naziunal a Mustér

Il biro dil Cussegli naziunal cul president Martin Candinas (sisum amiez) sil plaz avon la porta principala dalla claustra a Mustér.



La sesida da stad dil biro dil Cussegli naziunal ha liug tradiziunalmein el cantun da domicil della presidenta ni dil president dil Cussegli naziunal. Quest onn ha il president Martin Candinas envidau sias collegas e ses collegas – denter auter las presidentas ed ils presidents dallas fracciuns – el Grischun e menau ellas ed els el contuorn da Mustér.

## Seduta dalla fracciun dall'Allianza dil Center Grischun a Mustér

La fracciun dall'Allianza dil Center Grischun ha visitau Mustér.



La fracciun dall'Allianza dil Center Grischun ha salvau sia seduta ils 15 e 17 d'uost 2023 ella vischnaunca da Mustér. Sper las fatschentas ch'ein stadas da tractar per la sessiun digl uost ha la fracciun priu investa dalla claustra e survegniu entginas informaziuns davart il svilup communal ed ils projects turistics el sectur dalla pendicularas. Presente ein era ils treis cussegliers guvernativs stai, Marcus Caduff, Jon Domenic Parolini e Carmelia Maissen. Alla fracciun ha ei plaschiu fetg a Mustér ed in/a u l'auter/a deputau/deputada vegnin nus forsa puspei ad entupar ina fin d'jamna a Mustér.

# La «Missiun Cristalla» – in'aventura atras il vitg

Dapi la fin da zercladur 2023 san indigens e hospes da vacanzas ir alla tscherca d'ina cristalla magica el vitg da Mustér. La «Missiun Cristalla» ei in'aventura realisada dalla vischerna cun sustegn dalla Banca Raiffeisen Cadi.

Sper ina part da sia purschida nova ha il Center Fontauna introduciu la fin da zercladur ina purschida d'aventura per famiglias, gruppas, uniuns e fatschenistas. La «Missiun Cristalla» ei ina senda cun legns e pensums che meina atras il vitg da Mustér. Cun rispunder allas damondas e sligiar ils pensums arrivan las gruppas alla finamira.

## Denter tensiun ed interacziun

La «Missiun Cristalla» ei ina catscha da scazis ora el liber. «Ella ei in grondius program per pign e grond», accentuescha Gion Hosang, il meinafatschenta dil Center Fontauna. Quella purschida nova ei vegnida realisada cun sustegn dalla vischerna da Mustér ed in sponsoring dalla Banca Raiffeisen Cadi. Quella festivescha il giubileum da 100 onns uonn. «Entras nies engaschament havein nus saviu gidar a scaffir in project persistent en favur dalla populaziun ed il turissem», di Alfons Quinter, cau dalla direcziun dalla Banca Raiffeisen Cadi. Pil president communal, René Epp, eis ei evident: «Nus lein completar nossa purschida. Quella cheu ei ina denter tensiun ed interacziun.»

## Lavur el team

La catscha dils scazis atras il vitg da Mustér cuoza rodund treis uras e mesa e cumpeglia 19 posts. Alla partenza el Center Fontauna obtegn mintga gruppera ina tastga cugl equipament necessari pils pensums. Cartas da scazi barschadas, legns, maletgs vegls e bia inschignusadad ei necessaria per anflar la via. Quei reussescha sulettamein en lavur da team. Biaras varts



Gion Hosang, Alfons Quinter, René Epp sco era Clemens Berther dalla cumisiun dil Center Fontauna (da sen.) tier l'avertura ufficiala dalla «Missiun Cristalla».


nunenconuschentas dil vitg san vegnir scuvretgas. L'annunzia per l'aventura sa vegnir fatg online ([missiun-disentis.ch](http://missiun-disentis.ch)) ni directamein el Center Fontauna. La catscha da scazis meina sin sendas da viandar levas e vias atras Mustér. Sin fundament dil cuoz e dils pensums ei la «Missiun Cristalla» adattada per carschi ed affons naven dad otg onns.

## Segidar cun pader Giusep

Las participontas ed ils participonts dalla senda segidan cun pader Giusep. Lez pertgira la cristalla magica che pader Placidus a Spescha ha anflau avon pli che 200 onns. La veta da pader Placidus – il «curios pader» – sestenda dil reminent sco in fil tgietschen atras la historia della senda. Las gruppas han il pensum d'anflar la cristalla preziosa e da confirmar, che quella sesanfla aunc adina el liug secret. Via chat ei pader Giusep en contact culs participonts, dat ad els instrucziuns e segida tenor basegns. Silla senda cun ina lunghezia totala da 4,5 km arrivan las gruppas era tier differentas attracziuns da Mustér.



Alfons Quinter (sen.) e René Epp tier in dils 19 posts.



Ina dallas tablas cun informaziuns davart il scazi.

# Adia hotel Acla da Fontauna

**La fasa da spazzar il hotel Acla da Fontauna ha entschiet. Quei tierm ei vegnius festivaus sonda, ils 26 d'uost 2023. La populaziun ha giu la caschun da prender investa per ina davosa ga dil hotel. Ils representants dall'Immo Invest Partner SA han orientau davart il plan da termins e cusseglier guvernativ Marcus Caduff ha puntuau: «La Surselva sto crer vid siu potenzial. Cun sia purschida sto ella sezuppar da negin.»**

Sco quei che Fredy Ganz dall'Immo Invest Partner SA ha detg alla fiasta da cumiau dil hotel vegl ed il siet da partenza per la realisaziun dil project niev, accumpognan specialists e representants dalla Suva las lavurs vid il material cun asbestos e PCB. Pér cura che quell'etappa ei terminada vegn il baghetg spazzaus. Tut quei succeda entochen primavera 2024, lu duei vegnir entschiet culs fundaments pil hotel e per las tschun casas sigl areal davos il hotel. Il hotel niev cuntegn 159 combras ni suitas, las tschun casas davostier 23 habitaziuns secundaras e 44 habitaziuns administradas. Las habitaziuns administradas vegnan manischadas dalla hotellaria affittada da Mövenpick. El decours da 2026 ein las habitaziuns finidas, l'entschatta 2027 duei il hotel vegnir en funzion. Tut en tut vegn investau pli che 100 milliuns francs.

## In mument da legria

Al di da fiasta la fin d'uost ha il president communal René Epp puntuau: «Oz vegn scret il davos capitel dil hotel Acla da Fontauna ed il medem mument entscheiva ina nova era, quella dil project Fontauna. Igl ei in di da grond levgiament e da spetga suenter biars onns.» Suenter las grondas investiziuns dils davos onns entras Marcus Weber ellas pendiculares ed il Catrina Resort, ei quei cheu in ulteriur fetg grond project turistic. 2017 ei l'Immo Invest Partner SA vegnida numnada l'emprema ga en connex cul hotel Acla da Fontauna. «Sis onns ein passai dapi lu, mo co sedi ei: Quei che cuoza ditg vegn finalmein bien», di il president communal. La surbaghegiada Fontauna vegni ad esser in ulteriur project da refe-



Il president communal René Epp (sen.) e cusseglier guvernativ Marcus Caduff ensemen cun representants dall'Immo Invest Partner SA Fredy Ganz, Franz Hidber e Frenk Djordic.



La glieud ha priu stediamein investa dil hotel che vegn spazzaus ils proxims meins.



L'era dil hotel Acla da Fontauna vegn terminada cun in gentar. Persuenter astgan ins era star en colonna.

renza per la regiun: «Lein esser optimists e selegrar. Communablamein essan nus ferms.» René Epp engrazia als investurs per lur grond engaschament a Mustér.

## «Nus havein potenzial»

Tgei muntada ch'il project Fontauna ha demuossa la preschientscha ed il plaid da cusseglier guovernativ Marcus Caduff, cau dil departament dall'economia publica e dil socialesser dil cantun Grischun. «Igl ei buca casual che pendiculara e hotel Acla da Fontauna ein vegni construi praticamein parallel l'entschatta dils onns 1970. Oz ei la situaziun buca autra: in drova l'auter.» Quei mument ch'il hotel Acla da Fontauna seigi vegnius serraus e silsuenter era il Disentiserhof, seigien 90 000 pernottaziuns curdadas naven: «Quei ei ina plivalur annuala da rodund diesch milliuns francs che ha muncau a Mustér.» La Reka, il Catrina Resort, 64 letgs per hospes en claustra ed ussa il niev hotel Fontauna dettien nova dinamica turistica. Leutier s'audi era il Center Fontauna en sanaziun, pil qual la Regenza hagi concediu ina contribuziun finanziala dad in million francs. Concludend constatescha Marcus Caduff: «Sco Lumenzian sun jeu bunamein empau schalus da veser tgei ch'ei vegniu fatg e tgei che vegn investau sisum la Surselva. Era sco regiun stuein nus crer vid nies potenzial e buca spitgar entochen ch'auters vegnan e creien en quel. Nus stuein sezuppar da negin.»



Rodund 400 personas ein suandadas igl invit dall'Immo Invest Partner SA ils 26 d'uost 2023.



1986 ei Leo Monn entraus en survetsch dall'Intersoc sco pedel dil hotel Acla da Fontauna. Ils davos onns eis el staus engaschaus sco pedel en plazza parziala.



L'entrada dil hotel culla recepziun.

## Bellezia fiasta e processiun da fina bialaura

Dumengia, ils 9 da fenadur 2023 ha la claustra com-memorau la fiasta da s. Placi. Avat Vinzenz Wohl-wend dalla claustra da Wettingen-Mehrerau a Bre-genz el Vorarlberg ei staus predicatur festiv. La pro-cessiun cun tamburs, musica, parada dalla giuven-tetgna, hospes dalla Baselgia e dalla politica suenter il survetsch divin ha danovamein menau dalla baselgia da s. Martin entuorn la claustra entochen alla porta principala da quella. Leu ein la benedicziun e las salvas pils magistrats suandadas avon che la gronda raspada ei serendida al bein meritau gentar.

*Processiun da s. Placi da bellezi'aura e cun bia glieud.*



## Fiesta naziunala cun bien divertiment

La vischnaunca, l'Uniun da gimnastica Cadi, la Societat da musica Mustér e l'Uniun da costums Mustér han organisau uonn communablamein la fiesta naziunala digl emprem d'uost. Sedrun Mustér Turissem ha offeriu in apero. Pil beinstar corporal ha Gastro Mustér/ Val Medel procura. Suenter il beinvegni dalla presidenta dil cussegl da vischnaunca Helga Probst-Linder ha Sarina Caduff teniu il plaid festiv. Ella ei oriunda da Cumbel e secretaria dalla fracciun dall'Allianza dil Center dil Grischun el Cussegl grond. Il Duo Desertina, la gruppera acrobatica da Movis dall'Uniun da gimnastica Cadi ed ils Sunatiba Postabiala da Sumvitg han delectau ils presents. Als affons pigns ei vegniu purschiu in til da lampiuns. La fiesta naziunala ha giu liug sigl areal dalla halla a Cons.

## Nova senda da viandar dil Cuolm da Vi a Stgeinas

L'entschatta fenadur 2023 ei la nova senda da vian-dar dil Cuolm da Vi a Stgeinas vegnida inaugura. Ella meina dalla staziun da cuolm dalla pendiculara



*L'entschatta fenadur ei la nova senda da viandar dil Cuolm da Vi a Stgeinas a Mustér vegnida inaugura.*

nova sil Cuolm da Vi spel Péz las Palas entochen a Stgeinas en Val Segnas. Da leu eis ei pusseivel da viandar viers il Bostg a Sedrun ni a Caischavedra e da returnar da leu culla pendiculara a Mustér/ S. Catrina. L'inauguraziun ufficiala ei vegnida enra-mada da plaids dil president communal René Epp e dil president dil cussegl d'administraziun das Ppendicularas Mustér SA, Marcus Weber.

La vischnaunca da Mustér investescha cuntuada-mein en sia reit da sendas da bike e dils viandonts. Vischinias e vischins procuran stad per stad il mante-niment da quellas. Sper quei engaschament voluntari ei era il menaschi tecnic dalla vischnaunca involvius intensivamein en quell'incarica. Ina buna part dil temps da stad vegn impundius per lavurs vid las sendas. Tenor la vischnaunca duein singulas sendas star a disposiziun sulettamein per viandonts, outras sulettamein per bikers.

# Nies persunal

## Tschun damondas a Gion Tenner

**Gion Tenner, tgei mutta dar scola a Vus?**

Astgar instruir ed accumpignar ils giuvenils sin in tschancun da lur via ei per mei zatgei nundetg impur-tont che fa grond plascher.

**Tgei ei il bi vid dar scola ad affons ella vegliadetgna d'endisch ni dudisch onns?**

Ils affons vegnan ella 5. classa sco affons e partan dalla 6. classa sco miez carschi. En scola sai jeu far discussiuns e projects che fussen buca pusseivels cun scolars pli giuvens. Igl ei ina zun interessanta veglia-detgna nua ch'els sviluppan lur atgna persunalitad.

**Sch'ins quintass ensemens tuts affons ch'ein stai a scola tier Vus, dess quei in brav diember. Cons ei quei e co eis ei pil scolast sch'el entaupa ina ga ni l'autra scolar(a)s d'avon 20 onns?**

Actualmein ein quei ualti exact 500 scolarAs e s'entu-par cun elllas ni els ei adina special. El temps liber hai jeu era la caschun da collaborar cun biares e biars. Lu discussiunein nus davart episodas ed eveniments da tuttas sorts. Bi ei ch'ils biars miran anavos sin in bien temps. Udir ch'ei va bein cun elllas ed els ei mia satisfacziun.

**Co ei la scola semidada ils davos onns e decennis?**

Midadas e refuormas ha ei dau beinenqualina e bia ha fatg naufragi. Tgei ch'ei segir semidau ei la rolla dil scolast naven digl instructer al moderatur. Era la digitalisaziun mida l'instrucziun. Pils giuvenils eis ei indispensabel d'emprender da luvrar cun mieds digitals, da veser pusseivladads e cunfins, denton era prighels. Novs roms ein vegni vitier, mo la profunditad maunca. Vitier vegnan ina birocrazia cumplicada, leschas e directivas, pretensiuns da sociedad e geniturs: Savens sefatschentein nus cun caussas che s'udessen buc ell'instrucziun.

**Tgeininas ein las grondas sfidas actualas dalla scola, el cass concret dil scalem primar?**

Novs mieds d'instrucziun pretendan da filtrar e reducir il cuntegn per che fleivel e ferm sappi sesviluppar. Il medem vala era per la digitalisaziun: Co duvrar, controllar e filtrar tut quei enorm potenzial. Ils biars affons sefatschentan cun medias socialas. Quellas influeneschan lur patertgar ed agir. Bots selecziuneschan exact quels cuntegns ch'interesseschan ils giuvenils. Sch'ins sa buca quei, ei il prighel gronds da piarder la vesta pigl entir. Ils geniturs ein savens surdumandai e nus stuein mussar co duvrar nizeivla-mein ils mieds.



## Gion Tenner

**Vegliadetgna:** 55 onns

**Stadi civil:** ledi

**Scolast a Mustér dapi:** 1992

**Hobis:** pumpiers, musica, fotografar e grafica, informatica, cuschinari

**Lectura preferida:** litteratura dil fatg davart scola e mes hobis

**Spisa e bibronda preferida:** spisas grischnas, ina buna biera beltga

**Mia finamira persunala:** La via ei quella che fa nus ventireivels e buca la finamira. Perquei ein gest il mument ed il liug dad uss impurtons. Tut tschei fa buc senn.

# Chor baselgia Segnas

Igl onn 2017 ha il Chor baselgia Segnas festivau il giubileum da 100 onns. Dapi la fundaziun ha el impurontas funcziuns el vischinadi da Segnas. Spel cant sacral e profan ein ses commembers amitgs dalla cultura e dattan quita e sustegn als avdouts dalla gronda fraciun da Mustér.

Ils cantadurs activs contan sche pusseivel canzuns romontschas. En baselgia vegn era cantau en latin las messas mo era talas en romontsch. Plirs cumponists da canzuns romontschas derivan da Segnas. Auters umens dalla fraciun han scret ils plaids, ils quals ein vegni mess en melodia. Aschia ha il Chor baselgia Segnas litteratura e cant che deriva da ses commembers. Ei vegn buca mo cantau el chor. Ils cantadurs organiseschan mintg'onn entuorn Nadal l'exposiziun d'art en scola veglia dil vitg. Tgi che ha fatg bialas caussas creativas sa presentar e vender siu art. Ils cantadurs e lur partenarias fan da temps en temps viadis egl exterior ni era en marcaus en Svizra. Mintg'onn dat ei ina grillada, tscheinas ni cuors communabels.

Per menar el futur cun success ina tal'uniu drova ei claras structuras ed in tgamun activ ch'enconuscha sia incumbensa. La dirigenta ed il dirigent ein in duo che lavura bein ensemes. Els han bien maun e sentiment per eleger litteratura musicala, emprender e direger il cant. Sut lur bitgetta vegn cantau per messas festivas

## Chor baselgia Segnas

### Suprastonza

President: Edwin Deflorin  
Actuar: Paul Duff  
Cassier: Pierino Bisquolm  
Dirigents: Yvonne Flepp (cant profan) e Gion Tenner (cant sacral)

ed occurrentzas. Il chor fa part allas fiastas da cant ecclesiastic dalla regiun. Ils auditurs han plascher da tedlar ed ils experts laudan las presentaziuns tier las fiastas da cant. Quei fa era tschaffen als cantadurs, alla dirigenta ed al dirigent.

El Chor baselgia Segnas contan era cantadurs dils auters vitgs da Mustér. Tuts che contan bugen e stat tan bugen da cumpignia ein beinvegni. Per far cassa vegn fatg lavour cumina. Ei vegn cantau pils avdouts pli vegls dil vitg, ils quals survegnan in regal dil chor. Las bunas manas che van en cassa ein bein vegnidias. La suprastonza dil chor fa empau quitaus per l'existenza dall'uniu egl avegnir. Giuvens cantadurs ein grev d'anflar malgrad il bi ed attractiv program. Per dar in bien fiug ella veta da Segnas e contuorn envida il chor umens che sesentan plidentai d'entrar ella cumionanza, tuts ein beinvegni.

Il Chor baselgia Segnas alla fiesta da s. Roc 2023.



# Avon 100 onns – La baselgia da s. Placi

## La baselgia de s. Placi a Mustér.

En № 1148 della „Nova Gasetta de Turitg” pubblichecha il renomau archeolog sgr. E. A. Stückelberg de Basel intressantas notizias sur la baselgia veglia de s. Placi a Mustér.

Las stads 1922 e 1923 han ils dus archeologs Stükkelberg de Basel e P. Notker Curti a Mustér cun agid dil frater secular Paul Heimgartner, ils medems che han 1905 e 1906 giu scuvretg las ruinas della veglia baselgia claustral de s. Martin, discuvretg ella presenta baselgia de s. Placi ils fundaments dell’anteriura veglia baselgia dedicada agl emprem marter cristian della Surselva. S. Placi ei vegnius scavazzaus entourn 630 dals sbiers dil brutal preses retic Victor. Sia bara ei vegniida tschentada en ina fossa cun arviul ella baselgia claustral, anflada avon in decenni e miez egl englar denter la claustra e la baselgia Nossadunna. Gia baul han ins denton transferiu sias reliquias en in custeivel sarcofag en baselgia, nua ch’ellas ein restadas tochen 1048, per lu puspei vegnir deponidas ella fossa. 1498 ei quella puspei vegnida discuvretga. Lu han guerriers sursilvans dedicau a s. Placi ina tabla votiva returnond salvs ord l’uiara dils schuobs. Il reliquari vegli vegnius anflaus 1786, mo jus sutsu 1799 tier igl incendi della claustra. Il toc lenziel el qual il tgau de s. Placi fuva staus zugliaus, han ins giu conservau en claustra tochen tier l’invasion dils Franzos. Pliras reliquias dil marter vegnan relevadas dapi igl 13avel tschentaner en bia loghens della Svizzera; a Turitg conservavan ins 1333 ina part dil tgau de s. Placi en en ina capsula d’argien. Altars de s. Placi han ins eregiu a Cuera ed en auters loghens dapi il 13avel tschentaner. Era maletgis de s. Placi anflan, ins tscheu e lei ella diocesa de Cuera, specialmein in bi a Cuera sez. La legenda dil sogn ha il Turitges Conrad Meyer gravau 1640 en iron. Plifs scrutaturs e cronists, il brevier de Cuera e la Sinopsis de Mustér, las Acta Sanctorum dils Bollandists sco era il catalog general de Ferrari ed auters han tractau la legenda. Igl ei era vegniu secret himnis en divers lungatgs sin s. Placi.

El liug dil marteri ei gia baul vegniu baghiau, ina baselgia en honor e memoria dil sogn. Quel emprem sanctuari duei tenor la sinopsis, alla quala ins sa denton buca fidar adina esser vegnius eregius igl onn 801. La baselgia veglia ei 1458 vegnida destruida tras ina lavina della Vall s. Placi. Oz stat sin quei plaz ma gronda baselgia cull’annada 1655. Igl archeolog ha tschentau la damonda nua la baselgia de s. Placi dil temps miez pudevi star. Ei fuva de supponer, che ella miravi buca encunter mesanotg, sco l’actuala, mobein tenor usit ecclesiastic encunter la damaun. Tenor raquintar de vegls rapports de visitazion possedeva la baselgia de pli baul in „foramen” in ualit grond sfoss, che indicava exactamein il liug dil marteri de s. Placi. Ina rusna; el mir oriental della baselgia existenta regorda aunc oz vid quei plaz benediu.

Excavaziuns han mussau, che la baselgia veglia de s. Placi seigi d’encurir silla emprem a tiarza dil present sanctuari. Il mir meridional de quella croda presapauc sut la presenta fatschada, il mir septentrional encuntercomi sut ils emprems bauns baselgia ella nav. Quels mirs pudevan haver ina grossezia de 70 cm. Il plantschiu-baselgia schischeva 75–88 cm. sut igl actual. El tratsch cavau han ins anflau in grond diember fragments de pictura al fresco, ils biars cun colurs fetg frestgas. Il meglier fragment representa il tgau d’in um, ina pictura de grond art. Igl ei senza auer clar, ch’ei setracta cheu d’in’ovra d’in erudit artist talian dil 15avel tschentaner; ina tut autre capacitat, ch’il pictur, che ha componiu ils maletgis sjillas preits de s. Gada a Mustér. Singuls fragments digl affon Jesus e d’in palmer muossan, ch’ei existevva en quella baselgia in maletg de s. Cristofel. Numerus fragments daftan parts de fatschas, resti, mauns, combas. Vid in toc encorsch’ins claramein, ch’ei schai sut la colur ord il temps digl art gotic aunc ina pli veglia.

Tuts fragments anflai ein deponi el museum claustral.

Ei seigi cun quella caschun ual fatig menzion, che il premurau custos dil prezius museum archeologic, rev. P. Notker Curti, ha questa stad arranschau quel da niev e cun inschign en in grond local davos la caplutta de Nossadunna. In ornament dil museum ei in modell della claustra, sco ella sepresentava el temps miez cun sia baselgia de s. Martin — ina ovra de sgr. architect Dr. A. Hardegger e Br. Paul, als quals Stückelberg fa in compliment persuenter.



Ina foto da pli baul cun vesta si encunter Clavaniev.

## Calender d'occurrenzas

Venderdis, 10 da november 2023

Mustér: Referat dil convischin da Mustér Plutarch Chiropulos davart la veta dil sclav, dolmetscher e diplomat svizzer Johann Rudolf Schmid. Il referat ei per tudestg. Entschatta allas 19.30 ella sala el plaunterren dalla Casa cumin, entrada sper la Stiva grischuna. Organisaziun: La Culturella. Entrada libra, collecta.

Gliendisdis, ils 13 da november 2023,  
Fiera da s. Martin

Vischnaunca / Gemeinde Disentis/Mustér  
[www.disentis.ch](http://www.disentis.ch)

EVENTS mira era disentis-sedrun.ch  
[www.disentis-sedrun.ch/de/entdecken/veranstaltungen](http://www.disentis-sedrun.ch/de/entdecken/veranstaltungen)

## Naschientschas e mortoris

### NASCHIENTSCHAS

**Andrin Lombris**, naschius ils 20 da zercladur 2023, fegl da Gianna e Pirmin Lombris

**Jason Monn**, naschius ils 24 da fenadur 2023, fegl da Jessica e Raffael Monn

**Jorin Lozza**, naschius ils 31 da fenadur 2023, fegl da Guiana Nay e Giusep Lozza

**Giuchin Huonder**, naschius ils 31 da fenadur 2023, fegl dad Ursina ed Ursin Huonder

### MORTORIS

**Helena Giger-Bearth**, naschida ils 8 d'october 1933, morta ils 22 da zercladur 2023

**Verena Candinas-Schnider**, naschida ils 29 d'avrel 1935, morta ils 5 da fenadur 2023

**Giusep Condrau**, naschius ils 13 da december 1959, morts ils 7 da fenadur 2023

**Tresa Giger-Fry**, naschida ils 21 da fevrer 1932, morta ils 29 da fenadur 2023

**Avat em. Daniel Martin Schönbächler**, naschius ils 31 da mars 1942, morts ils 14 d'uost 2023

**Marlen Deflorin-Rainalter**, naschida ils 27 da schaner 1950, morta ils 15 d'uost 2023

**Reto Lutz-Stiefenhofer**, naschius ils 14 da november 1943, morts ils 20 d'uost 2023

## Nos giubilars

La vischnaunca ha saviu gratular a quater giubilars sin natalezis rodunds en aulta vegliadetgna.



**Mathias Coray-Truog**,  
7 da zercladur 2023,  
90 onns



**Irena Maissen-Deflorin**,  
27 da zercladur 2023,  
90 onns



**Placi Wenzin**,  
27 da zercladur 2023,  
90 onns



**Oscar Schnoz-Alig**,  
24 da settember 2023,  
90 onns

### Administraziun communală

Via Cons 2  
Caum postal 57  
7180 Disentis/Mustér

T 081 920 36 36  
[admin@disentis.ch](mailto:admin@disentis.ch)  
[www.disentis.ch](http://www.disentis.ch)